



**ATASSUT**

**UPA14/37/104-1**

**Knud Kristiansen**

**03.04.2014**

**Qaanaami, Ittoqqortoormiuni, Taasilami taakkualu nunaqarfiini nannunik aarrinik qilalukkanillu piniarnerup killilersorneqarunnaarsinnaanera, nunatta nunanik allanik isumaqatigiissutaasa pisussaaffiliinerisa iluani, periarfissaanersoq misissoqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Lars Mathæussen, Siumut)

**Kitaani ukiukkut aaffanniartarnerup januarip 15.-iat aallarnerfigalugu martsip 15.-iat ilangullugu ingerlanneqartartussanngorlugu Naalackersuisut Aavernik illersuineq piniarnerlu pillugit Namminersornerullutik Oqartussat nalunaarutaat nr. 20, 27. oktober 2006-imeersoq-p allanngortinneqarnissaannik peqquneqarnissaannik Inatsisartut aalajangiiffigisassaattut siunnersuut.** (Inatsisartunut ilaasortaq Nikolaj Jeremiassen, Siumut)

ATASSUT-miit siunnersuutit pillugit imaattumik oqaaseqaateqassaagut.

ATASSUT-mit pingaartittuarparput, nunatsinni piniakkat tamatigut piuaannartitsineq, nungusaataangitsumillu piniarneq aallaavigalugu pisassiissutit aallaaveqassasut. Aamma nunatsinni kalaalimernit nerisavut eqqarsaatigalugit *suli* annerusumik siamasinnerusumillu tunisassiarinissaat pingaartilluinnarparput. Tassami ATASSUT-mit isumaqarpugut, nunat tamarmik, inuiaallu tamarmik kulturimikkut, aamma kinaassutsimut *nerisatik* ilisarnaataasa annerit ilagigaat.

ATASSUT-mit illersortuarparput piniarnikkut nunatsinni periarfissat tamatigut naapertuuttumik inatsisitigut sinaakkuteqarnissaat, aamma sumiiffinnut pissutsinullu naleqqussarsimasunik inatsisit suliaassasut. Taamaattumillu aamma oqariartuutigiuarparput akisussaaffiit taakku, uani pisassiissutit eqqarsaatigalugit kommuuninut oqartussaaffik tunniunneqartariaqartoq.



Silaannaap allanngoriartornerata nunarput, ileqqugullu annertuumik unammillerpaat. Nannut eqqarsaatigalugit sikuusarunnaariartornerata nannut nerisaqarnikkut annertuumik sunnerpai, ilaatigut sikut ingerlanerulermata, tiffasinnerusumi ingerlaalterput.

ATASSUT-miit isumaqarpugut, ilisimatuussutsikkut *suli* paasiniaanerit annertuut piniakkat pineqartut eqqarsaatigalugit paasissutissanik pisariaqartitsisugut, aamma nunat eqqatsinniittut uumasogatigiit taakku pillugit ilisimatuussutsikkut sulineq suli annertunerusumik suleqatigiiffiginissaat pisariaqarluinnartutut isigaarput.

Pingaartumik silaannaap allanngoriartornerani sarfat nikinneranni, ilisimatusarnikkut sulinerup, aamma piniartut aalisartullu peqatigalugit suliffiginissaa annertusiartorpoq.

Paasissutissat ilisimatuussutsikkut pissarsiat, piniakkat amerlassusaannut, allanngoriartuutillu suussusersinissaannut pisariaqarluinnarput, aammalu pisassiinerni aallaaviulluinnartariaqarlutik.

Piniakkat killilersukkat piniartortatsinnit piniarneqartut illersussagutsigit, aammalu suli piniarsinnaanissaat ukiorpassuarni qulakkiissagutsigit ilisimatuussutsikkut sulineq pitsaasumik ineriartortittariaqarpoq, aammalu pisassiinerit naapertuuttut aallaviusariaqarput.

Nunarsuarmioqatitsinnit tatineqarneq milliartunngilaq. Soorlu nannut eqqarsaatigalugit, maanna liste 2-miittut ilisimavarput suli nunat ilaasa, nunat nukittuut sunniuteqartullu soqutigisaasa annerit ilagimmassuk liste 1-mut inissinneqarnissaat. Taamaattumik kulturitsinnut pingaaruteqarluinnartoq attatiinnarnissaanut nukittuumik inissisimanissarput pingaaruteqartuassaaq.

Siunnersuummi oqariartuutigineqartut ilaat ATASSUT-miit pingaartutut tiguarput, tassalu tunitsivissaqarnermut tunngasoq, isumaqarpugut tamanna pillugu periarfissaqartut, soqutigisaqartullu akuutillugit iliuusissamik aaqqissuussisariaqartoq.

ATASSUT-mit qitiutillugu tunngavigiuarparput nunatsinni kiffaangissuseqarluni inooriaaseqarnissamut periarfissat tamatigut atuunnissaat, tamannalu inatsisiliornikkut illersortuassavarput. Piniartut, aalisartut, inuillu namminneq qanoq inuussutissarsiuteqarnissaminnik



## ATASSUT INATSIARTUNI

---

toqqaasimanerat eqqarsaatigalugu. Minnerunngitsumillu kulturitsinnut attuumassuteqartut inuiaqatigiittullu naleqartitatsinnut tunngatillugit.

Taamatut oqaaseqarluta, innersuussutigissavarput siunnersuutit pineqartut aappasaaneerreqannginnerini ataatsimiititaliami suliarineqassasut.